

四庫全書

集部

欽定四庫全書

集部

石倉歷代詩選卷六十三

詳校官庶吉士臣范逢恩

侍讀臣孫球覆勘

總校官進士臣朱 鈐

校對官主事臣張慎和

謄錄監生臣周 鴻

欽定四庫全書

石倉歷代詩選卷六十二

明 曹學佺 編

中唐十六

元稹

字微之
河南人

清都夜境

夜久連觀靜斜月何晶熒寥天如碧玉歷歷綴華星樓
榭自陰映雲牖深冥冥纖埃悄不起玉砌寒光清栖鶴

露微影枯松多怪形南廂儼容衛音響如可聆啟聖發
空洞朝真趨廣庭閒開藥珠殿暗閱金字經屏氣動方
息凝神心自靈悠悠上車馬浩思安得寧

春晚寄楊十二兼呈趙八

蒙蒙竹樹深簾牖多清陰避日坐林影餘花委芳襟傾
樽就殘酌舒卷續微吟空際颺高蝶風中聆素琴廣庭
備幽趣復對商山岑獨此愛時景曠懷雲外心遷鶯戀
嘉木求友多好音自無琅玕實安得蓮花簪寄之二君

子希見雙南金

春餘遣興

春去日漸遲庭空草偏長餘英間初實雪絮縈珠網好
鳥多息陰新篁已成響簾開斜照入樹裊遊絲上絕跡
念物閒良時契心賞單衣頗新綽虛室復清敞置酒奉
親賓樹萱自怡養笑倚連枝花茶扶瑞藤杖步屨恣優
游望山多氣象雲葉遙卷舒風裊動蕭爽簪纓固煩雜
江海徒浩蕩野馬籠赤霄無由負羈鞅

秋夕遠懷

旦夕天氣爽風飄葉漸輕
星繁河漢白露逼衾枕清丹
鳥月中滅莎雞牀下鳴
悠悠此懷抱況復多遠情

分流水

古時愁別淚滴作分流水
日夜東西流分流幾千里通
塞兩不見波瀾各自起
與君相背飛去去心如此

含風夕

炎昏勸煩久逮此含風夕
夏服稍輕清秋堂已岑寂
載

欣涼宇曠復念佳辰擲絳緯驚歲功顧我何成績青熒
微月鈎幽暉洞陰魄水鏡涵玉輪若見淵泉璧參差簾
牖重次第籠虛白樹影滿空牀螢光綴深壁悵望斗牛
星復為經年隔露網裊風珠輕河泛遙碧循環切中感
撫今追往昔

春鳩

春鳩與百舌音響詎同年如何一時語俱得春風憐猶
知造物意當春不生蟬免教爭叫噪沸喟桃花前

春蟬

我自東歸日厭苦春鳩聲作詩憐化工不遣春蟬生及
來商山道山深氣不平春秋兩相似蟲豸百種鳴風松
不成韻蜩螗沸如羹豈無朝陽鳳羞與微物爭安得天
上雨奔渾河海傾蕩滌反時氣然後好晴明

桐花

朧月上山館紫桐垂好陰可憐暗澹色無人知此心舜
沒蒼梧野鳳歸丹穴岑遺落在人世光華那復深年年

怨春意不競桃杏林惟占清明後牡丹還復侵況此空
館閉云誰恣幽尋徒煩鳥噪集不語山欹岑滿院青苔
地一樹蓮花簪自開還自落暗芳終暗沈爾生不得所
我願裁為琴安置君王側調和元首音

種竹并序

昔樂天贈余詩云無波古井水有節秋竹竿余秋
來種竹廳下因而有懷聊書十韻

昔公憐友直比之秋竹竿秋來苦相憶種竹廳前看失

地顏色改傷根枝葉殘清風猶浙浙高節空團團鳴蟬
聒暮景跳蛙集幽欄塵土復晝夜梢雲良獨難丹丘信
云遠安得臨仙壇瘴江冬草綠何人驚歲寒可憐亭亭
榦一一青琅玕孤鳳竟不至坐傷時節關

與楊十二李三早入永壽寺看牡丹

曉入白蓮宮瑠璃花界淨開敷多喻草凌亂被幽徑壓
砌錦地鋪當霞日輪映蝶舞香暫飄蜂牽藥難正籠處
綵雲合露湛紅珠瑩結葉影自交搖風光不定繁華有

時節安得保全盛色見盡浮榮希君了真性

別李三

階棠附瑤砌叢蘭偶芳藿高位良有依幽姿亦相託鮑
叔知我貧烹葵不為薄半面契始終千金此然諾人生
繫時命安得無苦樂但感遊子顏又值餘英落蒼蒼秦
樹雲去去緱山鶴日暮分手歸楊花滿城郭

和樂天秋題曲江

十載定交契七十鎮相隨長安最多處應在曲江池梅

杏春尚小菱荷秋已衰
共愛寥落境相將偏此時綿綿
紅蓼花颺颺白鷺鷥詩句偶未得酒杯聊久持
今來雲雨曠舊賞魂夢知況乃江楓夕知君秋興詩

玉泉道中作

楚俗物候晚孟冬纔有霜
早農半華實夕水含風涼
遐想雲外寺峰巒眇相望
松門接官路勿滯分寸光

秋堂月

炎涼正迴互金火鬱相乘
雲雷暗交構川澤方蒸騰
清

風一朝勝白露忽已凝草木凡氣盡始見天地澄況此
秋堂夕幽懷曠無朋蕭條簾外雨倏閃案前燈書卷滿
牀席蠨蛸懸復升啼兒屢啞咽勸僮時寢興汎覽昏夜
目詠謠暢煩膺況吟獲麟章欲罷久不能堯舜事已遠
吾道安可勝蜉蝣不信鶴蜩鷄肯窺鵬當年且不偶歿
世何必稱胡為揚聞見褒貶貽愛憎焉用汨其泥豈在
清如冰無言被人覺余亦笑孫登

楊子華畫

楊畫遠于展何言今在茲依然古妝服但感時節移念
君一朝意遺我千載思子亦幾時客安能長苦悲

其二

皓腕卷紅袖錦鞬臂蒼鶚故人斷絃心裊齒從禽樂當
年惜貴遊遺形寄丹腹骨象或依稀鉛華已寥落似對
古人民無復昔城郭子亦觀病身色空俱寂寞

元和二年余官不了罰俸西歸三月六日至陝
府與吳十一兄端公崔二十二院長思愴曩

遊因投五十韻

小年閒愛春認得春風意未有花草時先釀曉窓睡霞
朝澹雲色霽景牽詩思漸到柳枝頭川光始明媚長安
車馬客傾心奉權貴晝夜塵土中那言早春至此時我
獨遊獨遊有倫次閒行曲江畔便宿慈恩寺扣林引寒
龜疏叢出幽翠凌晨過杏園曉露凝芳氣初暘好明淨
嫩樹憐低庠排房似綴珠欲啼紅臉淚新鶯語嬌小淺
水光流利冷飲空腹杯因成日高醉酒醒聞飯鐘隨僧

受遺施餐罷還復遊過從上文記行逢二月半始足遊
春騎是時春已老我遊亦云既藤開九華觀草結三條
隧新笋湧犀株落梅翻蝶翅名倡繡轂車公子青絲轡
朝士遇旬休豪家得春賜提携好音樂剪鏹空田地同
占杏花園喧闐各叢萃顧余煩寢興復往散憔悴倦僕
色肌羸蹇驢行跛痺春衫未成就冬服漸塵膩傾蓋吟
短章書空憶難字遙聞公主笑近被王孫戲邀我上華
筵橫頭坐賓位那知我年少深解酒中事能唱犯聲歌

偏精變籌義含詞待殘泊促舞遞繁吹叫噪擲投盤生
寧攝觥使逡巡光景晏散亂東西異古觀閉閒門依然
復幽閤無端矯情性漫學求科試薄藝何足云虛名偶
頻遂拾遺天子前密奏升平議召見不須臾儉庸已猜
忌朝陪香案班暮作風塵尉去歲又登朝身為柏臺吏
臺官相束縛不許放情志寓直勞送迎上堂煩避諱分
司在東洛所職尤不易罰俸得西歸心知受朝庇常山
攻小寇淮右擇良帥國難身不行勞生欲何為吾兄諳

性靈崔子同美味投此挂冠詞一生還自恣

三月二十四日宿曾峰館夜對桐花寄樂天

微月照桐花月微花漠漠怨澹不勝情徘徊拂簾幕葉
新陰影細露重枝條弱夜久春恨多風清暗香薄是夕
遠思君思君瘦如削但感事睽違非言官好惡奏書金
鑾殿步履青龍閣我在山館中滿地桐花落

遣春

久雨憐霽景偶來隄上行空濛天色嫩杳森江面平百

草短長出叢禽高下鳴春陽各有分余亦澹無情

月臨花

即林擒花

凌風颺花透影朧朧月坐峽隔波雲姑峰蒲霞雪鏡
勻嬌面粉燈泛高籠纈夜久清露多啼珠墜還結

紅芍藥

芍藥綻紅綃已離纖青瑣繁絲戲金藥高焰當爐火剪
刻彤雲片開張赤霞裏煙輕瑠璃葉風亞珊瑚朵受露
色低迷向人嬌婀娜酡顏醉後並小女妝成坐豔豔錦

不如天天桃未可晴霞畏欲散
晚日愁將墜結植本為誰賞
心期在我采之諒多思幽贈何由果

送王十一南行

夏水漾天末晚暘映遙村風翻馬尾勁
眷戀餘芳樽解袂方瞬息征帆已翩翩
江豚涌高浪槐樹搖去魂遠戍宗侶泊
暮煙州渚昏離心詎幾許歸苦復寒溫
此別信非久胡為坐憂煩我留石難轉
君泛雲無根萬里湖南月三聲山上猿
從茲耿幽夢夜夜湘與沅

西齋小松

松樹短于我清風亦已多
况乃枝上雪動搖微月波
幽姿得閒地詎感歲蹉跎
但恐屢終構藉君當奈何

松鶴

渚宮本坳下佛廟有臺閣
臺下三四松低昂勢前却是
時晴景麗松梢殘雪薄
日色相玲瓏纖雲映羅幕
逡巡九霄外似振風中鐸
漸見尺帛光孤飛唳空鶴
徘徊耀霜雪顧慕下寥廓
踴動樛盤枝龍蛇互跳躍
俯瞰九江

水旁瞻萬里壑無心盼烏鳶有字悲城郭清角已沈廢
虞韶亦冥冥騫翻勿重留幸及鈞天作

遣興

晚荷猶展卷早蟬遽蕭嘹露葉行已重況乃江風搖炎
夏火再伏清商暗迴飈寄言抱志士日月東西跳

表夏

初日滿堦前輕風動簾影旬時得休浣高卧閱清景
兒童拂巾箱鵝軋深林井心到物自閒何勞遠箕穎

早歸

春靜曉風微
凌晨帶酒歸
遠山籠宿霧
高樹影朝暉
飲馬魚驚水
穿花露滴衣
嬌鶯似相惱
含轉傍人飛

秋相望

簷月驚殘夢
浮涼滿夏衾
蠟蛸低戶網
螢火度牆陰
爐暗燈光短
牀空帳影深
此時相望久
高樹憶橫岑

解秋

漠漠江面燒
微微風樹煙
今日復今夕
秋懷方浩然
況

我頭上髮衰白不待年我懷有時極此意何由詮

遣病

燕巢官舍內我爾俱為客歲晚我獨留秋深爾安適風
高翅羽垂路遠煙波隔去去玉山人間網羅窄

其二

簷雨夜來曠暗知秋已生卧悲衾簟冷病覺肢體輕炎
昏豈不勸時去聊自驚浩歎終一夕空堂天欲明

其三

秋依靜處多況乃凌晨趣深竹蟬晝風翠茸杉曉露庭
莎病看長林果閒知數何以強健時公門日勞驚

其四

朝結故鄉念暮作空堂寢夢別淚亦流啼痕暗橫枕昔
愁憑酒遣今病安能飲落盡秋槿花離人疾猶甚

寒

江瘴節候暖臘初梅已殘夜來北風至喜見今日寒扣
冰殘塘水擁雪深竹欄復此滿樽醪但嗟誰與歡

古決絕詞

夜夜相抱眠幽懷尚沈結那堪一年事長遣一宵說但
感久相思何暇暫相悅虹橋薄夜成龍駕侵晨列生憎
野鶴性遲迴死恨天難識時節曙色漸曛曛華星欲明
滅一去又一年一年何時徹有此迢遞期不知生死別
天公隔是妒相憐何不便教相決絕

聽庾及之彈烏夜啼引

莫彈烏夜啼良人在獄妻在閨官家欲赦烏報妻烏前

再拜淚如雨烏作哀聲妻暗語後人寫出烏啼引吳調
哀絃聲楚楚四五年前作拾遺諫書不密丞相知謫官
詔下吏驅遣身作囚拘妻在遠歸來相見淚如珠惟說
閒宵長拜烏今君為我千萬彈烏啼啄啄淚瀾瀾感君
此曲有深意昨日烏啼桐葉墮

連昌宮詞

連昌宮中滿宮竹歲久無人森似束又有牆頭千葉桃
風動落花紅救救宮邊老人為余泣少年進食曾因入

上皇正在望仙樓太真同凭闌干立樓上樓前盡珠翠
炫轉熒煌照天地歸來如夢復如癡何暇備言宮裏事
初過寒食一百六店舍無煙宮樹綠夜半月高絃索鳴
賀老琵琶定場屋力士傳呼覓念奴念奴潛伴諸郎宿
湏臾覓得又連催特勅街中許然燭春嬌滿眼睡紅綃
掠削雲鬟旋裝束飛上九天歌一聲二十五郎吹管逐
逡巡大徧涼州徹色色龜茲轉錄續李謩壓笛傍宮牆
偷得新翻數般曲平明大駕發行宮萬人忤舞途中

百官隊仗避岐薛楊氏諸姨車闕風明年十月東都破
御路猶存祿山過驅令供頓不敢藏萬姓無聲淚潛墮
兩京定後六七年却尋家舍行宮前莊園燒盡有枯井
行宮門閉樹宛然爾後相傳六皇帝不到離宮門久閉
往來年少說長安玄武樓成花萼廢去年勅使因斫竹
偶值開門暫相逐荆榛櫛比塞池塘狐兔驕癡緣樹木
舞榭歌傾基尚在文窓窈窕紗猶綠塵埋粉壁舊花鈿
鳥啄風箏碎珠玉上皇偏愛臨砌花依然御榻臨階斜

蛇出燕巢盤關栱菌生香案正當衙寢殿相連端正樓
太真梳洗樓上頭晨光未出簾影黑至今反挂珊瑚鈎
指示傍人因慟哭却出宮門淚相續自從此後還閉門
夜夜狐狸上門屋我聞此語心骨悲太平誰致亂者誰
翁言野父何分別耳聞眼見為君說姚崇宋璟作相公
勸諫上皇言語切變理陰陽禾黍豐調和中外無兵戎
長官清平太守好揀選皆言由至公開元之末姚宋死
朝廷漸漸由妃子祿山宮裏養作兒虢國門前開如市

弄權宰相不記名依稀憶得楊與李廟謨顛倒四海搖
五十年來作瘡痍今皇神聖丞相明詔書纔下吳蜀平
官軍又取淮西賊此賊亦除天下寧年年耕種宮前道
今年不遣子孫耕老翁此意深望幸努力廟謨休用兵

織婦詞

織婦何太忙蠶經三卧行欲老蠶神女聖早成絲今年
絲稅抽徵早早徵非是官人惡去歲官家事戎索征人
戰苦束刀瘡主將勲高換羅幕綠絲織帛猶努力變緝

撥機苦難織東家頭白雙女兒為解挑紋嫁不得簷前
娟娟遊絲上上有蜘蛛巧來往羨他蟲豸解緣天能向
虛空織羅網

琵琶歌

琵琶宮調八十一旋宮三調彈不出玄宗偏許賀懷智
段師此藝還相匹自後流傳指撥衰崑崙善才徒爾為
湏聲少得似雷吼纏絃不敢彈羊皮人間奇事會相續
但有卞和無有玉段師弟子數十人李家管兒稱上足

管兒不作供奉兒拋在東都雙鬢絲逢人便請送杯盞
著盡功夫人不知李家兄弟不受酒我是酒徒為密友
著作曾邀連夜宿中碾春溪華新綠平明船載管兒行
盡日聽彈無限曲曲名無限知者鮮霓裳羽衣偏宛轉
涼州大偏最豪嘈六么散序多龍撚我聞此曲深賞奇
賞著奇處驚管兒管兒為我雙淚垂自彈此曲長自悲
淚垂捍撥朱絃濕冰泉嗚咽流鶯澁因茲彈作雨霖鈴
風雨蕭條鬼神泣一彈既罷又一彈珠幢夜靜風珊珊

低徊慢弄闌山思。坐對燕然秋。月寒一聲深殿磬。
驟彈曲破。音繁併百萬。金鈴旋玉盤。醉客滿船皆暫醒。
自茲聽後六七年。管兒在洛我朝天。遊想慈恩杏園裏。
夢寐仁風花樹前。去年御史留東臺。公私感促顏不開。
今春制獄正撩亂。晝夜推囚心似灰。暫輟歸時尋著作。
著作南園花折萼。臙脂耀眼桃正紅。雪片滿溪梅已落。
是夕青春值三五。花枝向月雲含吐。著作施樽命管兒。
管兒久別今方覩。管兒還為彈六么。六么依舊聲迢迢。

猿鳴雪岫來三峽鶴唳晴空聞九霄逡巡彈得六么徹
霜刀破竹無殘節幽闌鴟軋胡雁悲斷絃砧驕層冰裂
我為含淒歎欲絕許作長歌始終說藝竒思寡塵事多
許來寒暑又經過如今左降在閒處始為管兒歌此歌
歌此歌寄管兒爾衰之後繼者誰繼之無乃在鐵山鐵
山已近曹穆間性靈甚好功猶淺急處未得臻幽閒努
力鐵山勤學取莫遣後來無所阻

夜別宴

夜久酒闌燈花長燈花落地復落牀似我別淚三四行
滴君滿座之衣裳與君別後淚痕在年年著衣心莫改

何滿子歌

何滿能歌能宛轉天寶年中世稱罕嬰刑繫在圜圜間
下調哀音歌憤懣梨園弟子奏玄宗一唱承恩羈網緩
便將何滿為曲名御譜親題樂府纂魚家入內本領絕
葉氏有年聲氣短自外徒煩記得詞點拍纔成已夸誕
我來湖外拜君侯正值灰飛仲春瑄廣宴江亭為我開

紅妝逼座花枝暖此時有熊踴華筵未吐芳詞貌夷坦
翠蛾轉盼搖雀釵碧袖歌垂翻鶴卵定面凝眸一聲發
雲停塵下何勞筭迢迢擊磬遠玲玲一一貫珠勻款款
犯羽含商移調態留情度意拋絃管湘妃寶瑟水上來
秦女玉簫空外滿纏綿疊破最殷勤整頓衣裳頗閒散
冰含遠溜咽還通鶯泥晚花啼漸嬾斂黛吞聲若自寬
鄭袖見捐西子浣陰山鳴雁曉斷行巫峽哀猿夜呼伴
古者諸侯饗外賓鹿鳴三奏陳圭瓚何如有熊一曲終

牙籌記令紅螺盃

間

青衫經夏黥白髮望鄉稠雨冷新秋簾星稀欲曙樓連
鴻盡南去雙鯉本東流北信無人寄蟬聲滿樹頭

夜雨

水怪潛幽草江雲擁廢居雷驚空屋柱電照滿牀書竹
尾風頻裂茅簷雨漸疎平生滄海意比去怯為魚

湘南登臨湘樓

高處望瀟湘花時萬井香雨餘憐日嫩歲閨覺春長霞
刹分危榜烟波透遠光情知樓上好不是仲宣鄉

酒醒

飲醉日將盡醒時夜已闌暗燈風焰曉春席水窓寒未
解縈身帶猶傾墜枕冠呼兒問狼籍疑是夢中驢

別嶺南熊判官

十年常遠道不忍別離聲況復三巴外仍逢萬里行桐
花新雨氣梨葉晚春晴到海知何日風波從此生

景中秋

年年秋意緒多向雨中生漸欲煙火近稍憐衣服輕詠
詩閒處立憶事夜深行
渡落尋常慣淒涼別為情

遣行

徙倚簷宇下思量去住情
暗螢穿竹見斜雨隔窓聲就
枕回轉數聞雞撩亂驚一家同草草排比送君行

暮欲歌吹樂暗衝泥水情
稻花秋雨氣江石夜灘聲犬
吠穿籬出鷗眠起水驚愁君
明日夜獨自入山行

襄縣驛前境曲江池上情南堤衰柳意西寺晚鐘聲雲
水興方遠風波心已驚可憐皆老大不得自由行

滎陽鄭公以禎寓居嚴茅有池塘之勝寄詩獻

答

激射分流闊灣環此地多暫停隨梗浪猶閱敗霜荷恨
阻還江勢恩深到海波自傷才畎澮其奈贈珠何

賦得九月盡

霜降三旬後萸餘一葉秋玄陰迎落日涼魄盡殘鉤半

夜灰移琯明朝帝御裘
潘安過今夕休詠賦中愁

賦得雨後花

紅芳憐靜色深與雨相宜
餘滴下纖蘂殘珠墮細枝
浣花江上思啼粉鏡中窺
念此低徊久風光幸一吹

春病

病來閒卧久因見靜時心
殘月曉窓迴落花幽院深
望山移坐榻行藥步墻陰
車馬門前度遙聞哀苦吟

歸田

陶君三十七挂綬出都門我亦今年去商山浙坼村冬
修方丈室春種桔槔園幾許人間事從茲不復言

緣路

總是玲瓏竹魚藏淺漫溪沙平深見底石亂不成泥煙
火遙村落桑麻隔稻畦此中如遁世甘被到頭迷

夜閒

感極都無夢魂消轉易驚風簾半鉤落秋月滿牀明悵
望臨堦坐沈吟遶樹行孤琴在幽匣時迸斷絃聲

贈雙文

豔極翻含態，憐多轉自嬌。
有時還獨笑，閒坐更無聊。
曉月行看墮，春酥見欲銷。
何因肯垂手，不敢望回腰。

南昌灘

渠江明淨峽逶迤，船到明灘拽綫遲。
櫓竅動搖妨作夢，巴童指點笑吟詩。
畚餘宿麥黃山腹，日背殘花白水湄。
物色可憐心莫恨，此行都是獨行時。

夜坐

雨滯更愁南瘴毒月明兼喜北風涼
古城樓影橫空館濕地蟲聲遶暗廊
螢火亂飛秋已近星辰早沒夜初長
孩提萬里何時見狼藉家書滿卧牀

酬樂天歎窮愁見寄

病煎愁緒轉紛紛百里何由說向君
老去心情隨日減遠來書信隔年聞
三冬有電連春雨九月無霜盡火雲
併與巴南終歲熱四時誰道各平分

贈崔元儒

殷勤夏口阮元瑜二十年前舊飲徒最愛輕欺杏園客
也曾辜負酒家胡蕭蕭風景閒猶在事事顛狂老漸無
今日頭盤三兩擲翠蛾潛笑白髭鬚

鄂州寓館嚴澗宅

鳳有高梧鶴有松偶來江外寄行踪花枝滿院空啼鳥
塵榻無人憶卧龍心想夜閒惟有夢眼看春盡不相逢
何時最是思君處月入斜窻曉寺鐘

李中丞表臣

韋門同是舊親賓
獨恨潘牀簾有塵
十里花谿錦城麗
五年沙尾白頭新
倅戎何事勞專席
老掾甘心逐衆人
却待文星上天去
少分光影照沈淪

送友

輕風略略柳條新
晴色空濛遠似塵
斗柄未回猶帶閨
江痕潛上已生春
蘭成宅裏尋枯樹
宋玉亭前別故人
心斷洛陽三雨處
窈娘提抱古天津

春遊

酒戶年年減山行漸漸難
欲終心懶慢轉覺興闌珊
鏡水波猶冷稽峰雪尚殘
不能辜物色乍可怯春寒
遠目傷千里新年思萬端
無人知此意閒凭小欄干

送王協律遊杭越十韻

去去莫悽悽餘杭接會稽
松門天竺寺花洞若耶溪
浣渚逢新艷蘭亭識舊題
山經秦帝葬壘辨越王棲
江樹春常早城樓月易低
鏡澄湖面湄雲疊海潮齊
章甫官人戴萼絲姹女提
長干迎客開小市隔煙迷
紙亂紅藍

壓甌凝碧玉泥荆南無底物來日為儂攜

和樂天送客遊嶺南

我自離鄉久君那度嶺頻一杯魂慘澹萬里路艱辛江
館連沙市瀧船泊水濱騎田迴北顧桐柱指南隣大壑
浮三島周天過五均歌鐘排象背炊爨上魚身電白雷
山接旗紅賊艦新島夷徐市種廟覲趙佗神鳶跼方知
瘴蛇蘇不待春曙潮雲斬斬夜海火燐燐冠冕中華客
梯航異域臣果然皮勝錦吉了舌如人風默秋茅葉煙

埋曉月輪定應玄髮變焉用翠毛珍句漏砂須買貪泉
貨莫親能傳稚川術何患隱之貧

大雲寺二十韻

地勝宜臺殿山晴離垢氛現身千佛國護世四王軍碧
耀高樓瓦頰飛半壁文鶴林縈古道雁塔沒歸雲懔影
中天颺鐘聲下界聞攀蘿極峰頂游目到江濱馴鴿閒
依綴調猿靜守羣虎行風捷獵龍睡氣氤氲獲稻禪衣
卷燒畬劫火焚新英蜂采掇荒草象耕耘鉢付靈童洗

香教善女薰果枝低闌闌花雨澤雰雰示化維摩疾降
魔力士勲聽經神變幻說偈鳥紛紜上境先猶在深谿
闌不分竹籠煙欲暝松帶日餘曛真諦成知別迷心尚
有云多生沈五蘊宿習樂三墳喻鹿車雖設如蠶緒正
棼且將平等義還奉聖明君

與楊十二巨源盧十九經濟同遊大安亭各賦
二物合為五韻探得松石

片石與孤松曾經物外逢月臨栖鶴影雲抱老人峰蜀

客君當問秦官我舊封積膏當琥珀新劫長芙蓉待補
蒼蒼去樛柯早變龍

石榴

何年安石國萬里貢榴花迢遞河源道因依漢使槎酸
辛犯蔥嶺憔悴涉龍沙初到標珍木多來比亂麻深拋
故園裏少種貴人家惟我荊州見憐君胡地賒從教當
路長兼恣入簷斜綠葉栽煙樹紅英動日華新簾展透
影疎牖燭籠紗委作金鑪焰飄成玉砌瑕乍驚珠綴密

終誤繡幃奢琥珀烘梳碎燕支嬾頰塗風翻一樹火電
轉五雲車絳帳迎宵日芙蓉綻早牙淺深俱隱映前後
各分葩宿露低蓮臉朝光借綺霞暗虹徒繳繞濯錦莫
周遮俗態能嫌舊芳姿尚可嘉非專愛顏色同恨阻幽
遐滿眼思鄉淚相憐亦自嗟

度門寺

北祖三禪地西山萬樹松門臨溪一帶橋映竹千重剪
鑿基堦正包藏景氣濃諸巖分院宇雙嶺抱垣墉舍利

開層塔香爐占小峰道場居士置經藏大師封太子知
栽植神王守要衝由旬排講座丈六寫真容佛語迎陵
說僧行猛虎從修羅臺日炬樓至拔霜鋒畫井垂枯朽
穿池救噉喁蕉非難敗壞槿喻暫丰茸寶界留遺事金
棺滅去蹤鉢傳烘瑪瑙石長翠芙蓉影帳紗全落繩牀
土半壅荒林迷醉象危壁亞盤龍行色憐初月歸程待
晚鐘心源雖了了塵世苦懂懂宿蔭高聲識齋糧併力
春他生再來此還願總相逢

行宮

寥落古行宮宮花寂寞紅
白頭宮女在閒坐說玄宗

雪後宿同軌店上法護寺鐘樓望月

滿山殘雪滿山風
野寺無門院院空
煙火漸稀孤店靜
月明深夜古樓中

懼醉

聞道秋來怯夜寒
不辭泥水為盃盤
殷勤懼醉有深意
愁到醒時燈火闌

題李十一淨業所

雲闕朝迴塵騎合
杏花春盡曲江間
憐君雖在城中住
不隔人家便是山

亞枝紅

平陽池上亞枝紅
悵望山郵底事同
還向萬竿深竹裏
一枝渾卧碧流中

漢江笛

小年為寫游梁賦
最說漢江聞笛愁
今夜聽時在何處

月明西縣驛南樓

江花落

日暮嘉陵江水東
梨花萬片逐江風
江花何處最腸斷
半落江流半在空

送孫勝

桐花暗淡柳惺惚
池帶輕波柳帶風
今日與君臨水別
可憐春盡宋亭中

遠望

滿眼傷心冬景和一山紅樹寺邊多仲宣無限思鄉淚
潭水東流碧玉波

聞樂天授江州司馬

殘燈無焰影幢幢此夕聞君謫九江垂死病中驚坐起
暗風吹雨入寒窓

雨聲

風吹竹葉休還動雨點荷心暗復明曾向西江船上宿
慣聞寒夜滴篷聲

六年春遣懷

傷禽我是籠中鶴
沈劍君為泉下龍
重續猶存孤枕在
春衫無復舊裁縫

公無渡河音響絕
已隔前春復去秋
今日閒窓拂塵土
殘絃猶迸鈿瑩篴

憑李忠州寄書樂天

萬里寄書將上峽
却憑冰峽寄江州
傷心最是江頭月
莫把書將上庾樓

酬樂天舟泊夜讀微之詩

知君闔泊西江岼讀我閒詩欲到明今夜通州還不曙
滿山風雨杜鵑聲

重贈樂人商玲瓏

休遣玲瓏唱我詩我詩多是別君詞明朝又向江頭別
月落潮平是去時

別後西陵晚眺

晚日未拋詩筆硯夕陽空望郡樓臺與君後會知何日

不似潮頭暮却迴

長灘夢李紳

孤吟獨寢意千般
合眼逢君一夜歡
漸愧夢魂無遠近
不辭風雨到長灘

見樂天詩

通州到日日平西
江館無人虎印泥
忽向破簷殘漏處
見君詩在柱心題

嘉陵江

秦人惟識秦中水長想吳江與蜀江今日嘉川驛樓下
可憐如練遶明窓

岳陽樓

岳陽樓上日銜窓影到深潭赤玉幢悵望殘春萬般意
蒲櫓湖水入西江

寄庾敬休

小來同在曲江頭不省春時不共遊今日江風好暄暖
可憐春盡古湘州

宿石磯

石磯江水夜潺湲
半夜江風引杜鵑
燈暗酒醒顛倒枕
五更斜月入空船

澧西別樂天

今朝相送自同遊
酒語詩情替別愁
忽到澧西總回去
一身騎馬向通州

西歸絕句

雙旆頻頻減去程
漸知身得近京城
春來愛有歸鄉夢

一半猶疑夢裏行

五年江上損容顏
今日春風到武關
兩紙京書臨水讀
小桃花樹滿商山

寒花帶雪滿山腰
著柳冰珠滿碧條
天色漸明回一望
玉塵隨馬度藍橋

雜思詩

山泉散縵繞階流
萬樹桃花映小樓
閒讀道書慵未起
水晶簾下看梳頭

尋常百種花齊發
偏摘梨花與內人
今日江頭兩三樹
可憐枝葉度殘春

雜憶

今年寒食月無光
夜色纔侵已上牀
憶得雙文通內裏
玉櫳深處闌聞香

無題

夜深行到戟門邊
衆鳥無聲思悄然
明月一庭池水綠
桐花垂在繡簾前

石倉歷代詩選卷六十二

欽定四庫全書

石倉歷代詩選卷六十三

明 曹學佺 編

中唐十七

張繼

字懿孫
兗州人

郢城西樓吟

連山盡塞水縈迴山上戍門臨水開朱欄直下一百丈
日暖遊鱗自相向昔人愛險閉層城今人復愛閒江清

沙洲楓岬無求客
草綠花開山鳥鳴

馮翊西樓

城上西樓倚暮天
樓中歸望正悽然
近郭亂山橫古渡
野莊喬木帶新煙
北風吹雁聲能苦
遠客辭家月再圓
陶令好文常對酒
相招那惜醉為眠

登丹陽樓

寒臯那可望
旅客又初還
迢遞高樓上
蕭疎涼野間
暮晴依遠水
秋興屬連山
浮客時相見
霜凋朱翠顏

酬張二十員外前國子博士竇叔向

故交日零落心賞寄何人
幸與馮唐遇心同迹復親
語言未終夕離別又傷春
結念湓城下聞猿詩興新

晚次淮陽

微涼風葉下楚俗轉清閒
候館臨秋水郊扉掩暮山
月明潮漸滿露濕雁初還
浮客了無定萍流淮海間

初出徽安門

洛陽天子縣金谷石家鄉
草色侵官道花枝出苑牆
書

成休逐客賦罷遂為郎貧賤非吾事西遊當自強

會稽秋晚奉呈于太守

寂寂訟庭幽森森戟戶秋山光隱危堞湖色上高樓禹
穴探書罷天台作賦遊浮雲將越客歲晚共淹留

送竇十九判官使江南

遊宦淹星紀裁詩鍊土風今看乘傳去那與問津同南
郡過徐子臨川謁謝公思歸一惆悵干越古亭中

江上送客遊廬山

楚客自相送霑裳春水邊晚來風信好併發上江船
花映新林岼雲開瀑布泉愜心應在此佳句向誰傳

送張中丞歸幕

獨受主恩歸當朝似者稀玉壺分御酒金殿賜春衣
拂席流鶯醉鳴鞭駿馬肥滿臺簪白筆捧手戀清輝

春夜皇甫冉宅歡宴

流落時相見悲歡共此情興因樽酒洽愁為故人輕
暗滴花垂露斜暉月過城那知橫吹曲江外作邊聲

題嚴陵釣臺

舊隱人如在清風亦似秋客星沈夜壑釣石俯春流鳥
向深枝聚魚依淺瀨遊古來芳餌下誰是不吞鉤

送鄒判官往陳留

齊宋傷心地頻年此用兵女停襄邑杼農廢汶陽耕使
者乘輶去諸侯擁節迎深仁荷君子薄賦恤黎氓火燎
原猶熱波搖海未平應將否泰理一問魯諸生

奉送王相公赴幽州

黃閣開幃幄丹墀拜冕旒位高湯左相權總漢諸侯不
改周南化仍分趙北憂雙旌過易水千騎入幽州塞草
連天暮邊風動地愁無因隨遠道結束佩吳鉤

酬李書記校書越城秋夜見贈

東越秋城夜西人白髮年寒城警刁斗孤憤抱龍泉鳳
輦棲岐下鯨波鬪洛川量空海陵粟賜汎水衡錢投閣
嗤揚子飛書代魯連蒼蒼不可問予亦賦思玄

會稽郡樓望雪

江城昨夜雪如花
郢客登樓望霽華
大禹壇前仍聚玉
西施渚上更飄紗
簾櫳向晚寒風度
睥睨初晴落影斜
數處微明消不盡
湖山清映越人家

陸沈詩上禮部楊侍郎

調與時人背心將
靜者論終年
帝城裏不識五侯門

楓橋夜泊

月落烏啼霜滿天
江村漁火對愁眠
姑蘇城外寒山寺
夜半鐘聲到客船

閭門即事

耕夫召募逐樓船
春草青青萬頃田
試上吳門看郡郭
清明幾處有新煙

上清詞

紫陽宮女捧丹砂
王母令過漢帝家
春風不肯停仙馭
却向蓬萊看杏花

安公房問法

流年一日復一日
世事何時是了時
試向東林問禪伯

遣將心地學瑠璃

張南史

字季直
幽州人

雪中行

繁花飛玉屑陰風凝暮節高嶺虛以晶平原廣而潔初
從雲外飄還向空中噓妙舞洛陽人應憐郢歌絕

竹

竹價長東南別種殊草木成林處處雲抽笋年年玉天
風起成韻池水涵更綠閒臨庾信園數竿心自足

草

芳草忽復滋滿地催人老金鋪沿玉砌荒城埋古道青
青千里遙悵悵三春早每逢南北離乍逐東西倒本是
山中人王孫慰懷抱

月

月暫盈還缺虛空生溟渤散彩光無際移輪不暫歇桂
殿入西秦菱歌映南越正看秋霧卷莫待關山沒天涯
地角不可尋清光永夜何超忽

奉酬李舍人秋日寓直見寄

秋日金華直遙知玉佩清
九重門更肅五色詔初成
槐落宮中影鴻高苑外聲
翻從魏闕下江海寄幽情

同韓侍郎秋朝使院

重門啟曙闌一葉報秋還
露井桐柯濕風庭鶴翅閒
忘情簪白筆假夢入深山
惆悵祇應此難裁語默間

賀崔中丞中秋月

秋夜月偏明西樓獨有情
千家看露濕萬里覺天清
映

水金波動銜山桂樹生不知飛鵲意何用此時驚

富陽南樓望浙江風起

南樓渚風起樹杪見滄波稍覺征帆上蕭蕭暮雨多沙洲殊未極雲水更相和欲問任公子垂綸意若何

寄中書李舍人

昨宵淒斷處對月與臨風鶴病三江上蘭衰百草中題詩隨謝客飲酒寄黃翁早歲心相待還因貴賤同

宣城雪後還望郡中寄孟侍御

臘後年華變關西驛騎遙塞鴻連暮雪江柳動寒條山
水還鄆郡圖書入漢朝高樓非別處故使百憂銷

殷卿宅夜宴

日暗城烏宿天寒櫪馬嘶詞人留上客妓女出中閨積
雪連燈照迴廊映竹迷太常今夜宴誰不醉如泥

西陵懷靈一上人兼寄朱放

淮海風濤起江關憂思長同悲鵲遶樹獨坐雁隨陽山
晚雲藏雪汀寒月照霜由來濯纓處漁父愛滄浪

寄靜虛上人雲門

寒川白雲裏法侶自提攜竹逕通城下松門隔水西方
同沃洲去不自武陵迷髣髴心知處高峰是會稽

送司空十四北遊宋州

九拒危城下蕭條送爾歸寒風吹盡角暮雪犯征衣道
里猶成間親朋重與違白雲愁欲斷看入大梁飛

送朱大遊塞

歲暮一為別江湖聊自寬且無人事處誰為客行難郢

曲憐公子吳州憶伯鸞蒼蒼遠山際松柏獨宜寒

送鄭錄事赴太原

歎息不相見紅顏今白頭重為西候別方起北風愁六
月胡天冷雙城汾水流盧諶即故吏還復向并州

送余贊善使還赴薛尚書幕

音書不可論河塞雪紛紛雁足期蘇武狐裘見薛君城
池通紫陌鞍馬入黃雲遠憶漳渠水平流幾處分

送李侍御入茅山採藥

苦縣家風在茅山道錄傳聊聽驄馬使却就紫陽仙江
海從岐路雲霞入洞天莫令千歲鶴飛到草堂前

泉

泉色淨苔蘚石激雲中懸津流通竹樹脉亂鬱山川扣
玉千聲應含風百道連太液歸池上雲陽出宮邊陵深
鑿不到添淚作潺湲

獨孤常州北亭

北溟敞高明憑軒見野情朝回五馬跡更勝百花名海

樹凝煙遠湖田見鶴清雲光侵素壁水影蕩閒楹俗賴
寨帷謁人歡倒屣迎始能崇結構獨有謝宣城

早春書事奉寄中書李舍人

儒服山東士衡門洛下居風塵遊上路簡冊委空廬戎
馬生郊日賢人避地初竄身初浩蕩投迹豈躊躇翠羽
憐窮鳥瓊枝顧散樗還令親道術倒欲混樵漁敝緼袍
誰補飛蓬鬢少梳誦詩陪賈誼酌酒伴應璩鶴膝兵家
備鳧茨儉歲儲泊舟依野水開徑接園蔬暫閱新山澤

長懷故里間思賢乘朗月覽古到荒墟在竹慙充箭為
蘭幸免鋤那堪聞相府更遣詣公車蹇足終難進頰眉
竟未舒事從因病止生寄負恩餘不見神仙久無由鄙
恠祛帝庭張禮樂天閣繡簪裾日色浮青瑣香煙近玉
除神清王子敬氣逐馬相如銅漏時常靜金門步轉徐
惟看五字表不記八行書宿昔投知己周旋謝起予祇
應高位隔詎是故情疏為報周多士須憐楚子虛一身
從棄置四節苦居諸柳發三條陌花飛六輔渠靈盤浸

沈瀧龍首映儲胥北海樽留客西江水救魚長安同日
遠不敢詠歸歟

陸勝宅秋暮雨中探韻同作

同人永日自相將深竹間園偶辟疆已被秋風教憶鱸
更聞寒雨勸飛觴歸心莫問三江水旅服從沾九日霜
醉裏欲尋騎馬路蕭條是處有垂楊

春日道中寄孟侍御

春來遊子傍歸路時有白雲遮獨行水流亂赴石潭響

花開不知山樹名誰家魚網求鮮食幾處人煙事火耕
昨日已嘗村酒熟一杯思與孟嘉傾

江北春望贈皇甫補闕

閒園柳綠井桃紅野逕荒墟左右通清迴獨連江水北
芳菲更似洛城東時看雨歇雲歸岫每覺潮來樹起風
聞道金門堪濟世何須身與海鷗同

酬張二倉曹楊子閒居見寄兼呈韓郎中左補
闕皇甫冉

孤雲獨鶴自悠悠別後經年尚泊舟漁父致詞相借問
仙郎能賦許依投折芳遠計三春草乘興閒看萬里流
莫怪杜門頻乞假不堪扶病拜龍樓

秋夜聞雁寄南十五兼呈空和尚

晚節聞君道趣深結茅栽樹近東林大師幾度曾摩頂
高士何年更發心北渚三更聞過雁西城萬木動寒砧
不見支公與玄度相思擁膝坐長吟

暢當

河東人

宿報恩寺精舍

鐘梵送沈景星多露漸光風中蘭靡靡月下樹蒼蒼夜
殿若山橫深松似澗涼羸然虎溪子遲我一虛牀杳杳
空寂舍濛濛蓮桂香擁褐依西壁紗燈靄中央

天柱隱所重答江州應物

寂寞一悵望秋風山景清此中惟草色翻意見人行荒
徑饒松子深蘿絕鳥聲陽崖全帶日寬嶂偶通耕拙昧
難容世貧寒別有情煩君瓊玖贈幽懶百無成

自平陽館赴郡

晨興平陽館見月沈江水溶溶山霧披蕭蕭沙鷺起奉
恩謬符竹伏軾省頑鄙何當施教化媿迎小郡吏寥落
火耕俗征途青冥裏德綏及吾民刑施無乃耳擒奸非
性能多愍會衰齒恭承共理詔恒懼墜諸地

山居酬韋蘇州見寄

孤木泄煙處此中山叟居觀雲寧有事耽酒詎知余水
定鶴翻去松歌峰儼如猶煩使君問更欲結深廬

軍中醉飲寄沈八劉叟

收入杜集誤

酒渴愛江清，餘酣漱晚汀。
軟莎歌坐穩，冷石醉眠醒。
野膳隨行帳，華音發從伶。
數杯君不見，都已遣沈冥。

偶宴西蜀摩訶池

珍木鬱波池，風荷左右披。
淺觴寧及醉，慢舸不知移。
蔭簾流光冷，凝簪照影歆。
胡為獨羈者，雪涕向漣漪。

奉送杜中丞赴洪州

詔出鳳皇宮，新恩連帥雄。
江湖經戰陣，草木待仁風。
豪

右威行愛紆繁德自通多慙君子顧攀餞路塵中

春日過曲江

帝里陽和日遊人到御園暖催新景象春認舊蘭蓀詠
德先臣沒成蹊大樹存見桐猶近井看柳尚依門獻地
非更宅遺忠永奉恩又期攀桂後來賞百花繁

登鸛雀樓

迴臨飛鳥上高出世塵間天勢圍平野河流入斷山

宿潭上

夜潭有仙舸與月當水中佳賓愛明月遊子驚秋風

別盧綸

故交君獨在又欲與君離我有新秋淚非關秋氣悲

題沈八齋

江齋一入宛亭亭因寄淪漣心杳冥綠綺琴彈白雪引

烏絲絹勒黃庭經

冷朝陽

大歷間人

別郎上人

過雲尋釋子話別更依依靜室開來久遊人到自稀觸
風香氣盡隔水磬聲微獨傍孤松立塵中多是非

送遠上人歸京

夏臘歲方深思歸徹曙吟未離銷雪院已有過雲心寒
磬清函谷孤鐘宿華陰別京舊遊寺月色似雙林

冬日逢馮法曹話懷

分襟二年內多少事相干禮樂風全變塵埃路漸難秋
林新葉落霜月滿庭寒雖喜逢知己他鄉歲又闌

中秋與空上人同宿華嚴寺

掃榻相逢宿論詩
舊梵宮磬聲迎鼓
盡月色過山窮
庭簇安禪草窗飛帶火蟲
一宵何惜別回首隔秋風

送唐六赴舉

秋色生邊思送君西入關
草衰空大野葉落露青山
故國煙霞外新鴻道路間
碧霄知己遇叢桂若為攀

瀑布

潺湲半空裏霖雨石房邊
風激珠光碎山歌練影偏
急

流難起浪迸沫易成煙自古惟今日淒涼一片泉

同張深秀才遊華嚴寺


同遊雲外寺渡水入禪關立掃窗前石坐看池上山有
僧飛錫到留客話松間不是緣名利長來作伴間

宿柏巖寺

幽寺在巖中行惟一逕通客吟孤嶠月蟬噪數枝風秋
色生苔砌泉聲入梵宮吾師修道處不與世間同

無題

采菱歌怨木蘭舟送客魂銷百尺樓還似洛妃乘霧去
碧天無際水空流



石倉歷代詩選卷六十三

欽定四庫全書

集部

石倉歷代詩選卷六十四至七

詳校官庶吉士臣范逢恩

侍讀臣孫球覆勘

總校官進士臣朱 鈐

校對官助教臣汪學金

謄錄監生臣周 煥

欽定四庫全書

石倉歷代詩選卷六十四

明 曹學佺 編

中唐十八

楊衡

字仲師
吳興人

送春

三月三十日春歸日復暮惆悵問春風明朝應不住送
春曲江上眷眷東西顧但見撲水花紛紛不知數人生

似行客兩足無停步日日趣前程前程幾多路
兵刃與水火水火盡可違之去惟有老到來人間
無避處感時良為已獨倚池南樹今日送春心
心如別親故

經端溪峽中

陰岼東流水上有微風生素羽漾翠澗碧苔數
丹英重林宿雨晦遠岫孤霞明飛狖相攀牽白
雲亂縱橫有客泝輕櫂閱勝匪羈程逍遙一息
間糞土五侯榮塞茗廡燭熱激泉聊折醒寄言
絲竹者詎識松風聲

秋夜閒居即事寄廬山鄭員外蜀郡符處士

憂思繁未整良辰會無由引領遲佳音星紀屢以周蓬
閨絕華耀况乃處窮愁墜葉寒擁砌燈光夜悠悠開琴
弄清弦窺月俯澄沅冉冉鴻雁度蕭蕭惟箔秋悵懷石
門詠緬邀碧鷄遊髣髴蒙顏色叢蘭隱芳洲

送鄭丞羅浮中習業

百年泛飄忽萬事繫衰榮高鴻脫矰繳達士去簪纓始
從天目遊復作羅浮行雲卧石林密月窺花洞明全形

在氣和習默憑境清風秘絳囊訣屢投金簡名鐘甕促
離觴煙霞隨去程何當真府內重得款平生

送公孫器自桂林歸蜀

桂林淺復碧潺湲半露石將乘觸物舟暫駐飛空錫蜀
林異青眼蓬戶高朱戟風度杳難尋雲飄詎留跡舊戶
閒花草馴鴿傍簷隙揮手共忘懷日墜千山夕

秋夜桂州宴送鄭十九侍御

秋至觸物愁况當離別筵短歌銷夜燭繁緒徧高絃桂

水舟始泛蘭堂榻詎懸一杯既離阻三歲奉周旋鴉噪
更漏寂露濡風景鮮斯須不共此且為更留連

登紫霄峰贈黃仙師

紫霄不可陟靈峰信穹崇下有瓊樹枝上有翠髮翁雞
鳴秋漢側日出紅霞中璨璨真仙子執旄為侍童焚香
杳忘言默思含太空世華徒熠耀虛室自朦朧雲氣瓊
瑤圃龜息芝蘭叢玉錄掩不開天窓微微風茲焉悟佳
音塵境亦幽通浩淼臨廣津永用挹無窮

題玄和師仙藥室

山邊蕭寂處石掩浮雲扃
遶室微有路松煙深冥冥
入松汲寒水對鶴問仙經
石几香未盡水花風欲零
何年去華表幾度窮蒼冥
却顧宦遊子眇如霜中螢

遊陸先生故巖居

獨壑臨萬嶂蒼苔絕行跡
仰窺猿挂樹俯對鶴巢石
上有一巖屋相傳靈人宅
深林無陽暉幽水轉鮮碧
拾薪遇遺鼎探空得古籍
結念候雲興燒香坐終夕

遊峽山寺

結構天南畔勝絕固難儔
幸蒙時所漏遂得恣閒遊
路石蔭松蓋檻藤維鶴舟
雨霽花木潤風和景氣柔
寶殿敞丹扉靈幡垂絳旒
照曜芙蓉壺金人居上頭
翔禽拂危剎落日避層樓
端溪瀾漫駛曲澗潺湲流
高居何重沓登覽自夷猶
煙霞無隱態巖洞詎遺幽
奔駟非久耀馳波肯暫留
會從香火緣滅跡此山丘

宿陟岵寺雲律師院

像宇鬱參差寶林疎復密中有彌天子燃燈坐虛室心
澄紅蓮喻跡羈青眼律玉鑪揚翠煙金經開縹帙肆陳
堅固學破我夢幻質碧水灑塵纓涼扇當夏日宿禽詎
相保迸火煙欲失願迴戚促勞趨隅事休逸

詠蓮

凝鮮霧渚夕陽艷綠波風魚遊乍散藻露重稍歇紅楚
客傷暮節吳娃泣敗叢促令芳本固寧望雪霜中

病中赴袁州次香館

病興愁上館繚繞向山隅荒葛漫歌壁幽禽啄朽株力
微怯升降意欲結踟躕誰能挹香水一為濯煩紆

朱絲絃

寂寞瑤琴上深知直者情幸傳朱鷺曲那止素絲名瑞
草人空仰王言世久行大方聞正位樂府動清聲文武
音初合宮商調屢更誰能向機杼終日泣無成

征人

西風屢鳴雁東郊未昇日繁煙漠漠昏暗騎蕭蕭出望

雲愁玉塞眠月想蕙質借問露沾衣何如香蒲室

盧十五竹亭送姪倆歸山

落葉寒擁壁清霜夜沾石正是憶山時復送歸山客殷
勤盈樽酒曉月當窓白

江陵送客歸河北

遠客歸故里臨路結徘徊山長水復濶無因重此來聊
將歌一曲送子手中杯

送王秀才往安南

君為蹈海客客路誰諳悉鯨度乍凝山鷄鳴先見日所
嗟迴棹晚倍結離情密無貪合浦珠念守江陵橘

桂州與陳羽念別

慘戚損志抱因君時解顏重歎今夕念復在幾夕間碧
桂水連海蒼梧雲滿山茫茫從此去何路入秦關

長安秋二首

玉纓翠佩雜輕羅香汗微清朱顏酖為君起唱白紵歌
清聲裊雲繫思多疑笳哀瑟時相和金壺半傾芳夜促

梁塵霏霏闌紅燭令君安坐聽終曲
墜葉飄花難再復
躡珠履步瓊筵輕身起舞紅燭前
芳姿艷態妖且妍迴
眸轉袖暗催絃涼風蕭蕭漏水急
月華泛灩紅蓮濕牽
袂攬帶翻成泣

烏啼曲

可憐楊葉復楊花雪淨煙深碧玉家
烏栖不定枝條弱
城頭夜半聲啞啞浮萍流蕩門前水
任留芙蓉莫浣紗
宿雲溪觀賦得秋燈引送客

雲房寄宿秋夜客一燈熒熒照虛壁
蟲聲呼客客未眠
幾人語話清景側不可離別愁紛多
秋燈熒熒奈別何

哭李象

白雞黃犬不將去寂寞空餘葬時路
草苑花開年復年
後人知是何人墓憶君思君獨不眠
夜寒月照青楓樹

宿陸氏齋賦得殘燈詩

殷勤照永夜屬思未成眠餘暉含薄霧
落燼迸空筵誰
比秦樓曉絨愁別幌前

經趙處士居

雲居避世客髮白習儒經有地草空綠無人山自青廢
梁悲遊水卧木思荒庭向夕霏煙歛徒看處士星

春日偶題

何處春先到橋東水北亭凍花開未白弱柳綻微青就
日移輕榻避風畏小屏不勞人勸醉鶯語漸叮嚀

秋夜

漢浦常多別星橋忽重遊向雲迎翠輦當月拜珠旒寢

幌凝宵態妝奩閑晚愁不堪鳴杼日空對白榆秋

廣州石門寺重送李尚赴朝時兼宗正卿

象闕趨雲陞龍宮憩石門清鏡猶啓路黃髮重攀轅藻
變朝天服珠懷委地言那令蓬戶客茲席未離樽

送孔周南之海謁王尚書

泛棹若流萍桂寒山更清望雲生碧落看日下滄溟潮
盡收珠母沙閒拾翠翎自趨龍戟下再為誦芳馨

冬夜舉公房送崔秀才歸南陽

聞君動征棹，犯夕故來尋。
強置一樽酒，重欸百年心。
燈火霜氣冷，室虛松韻深。
南陽三顧地，幸偶價千金。

題山寺

千峰白露後，雲壁掛殘燈。
曙色海邊日，經聲松下僧。
意閒門不閉，年去水空澄。
稽首如何問，森羅盡一乘。

送徹公

白首年空度，幽居俗豈知。
敗蕉依晚日，孤鶴立秋墀。
久客何由造，禪門不可窺。
會同塵外友，齋沐奉威儀。

贈廬山道士

寂寥高室古松寒松下仙人字委鸞頭垂白髮朝鳴磬
手把青芝夜遠壇物象自隨塵外滅真源長向性中看
悠悠萬古皆如此秋比松枝春比蘭

詠春色

靄靄復濛濛非霧滿晴空密添宮柳翠暗泄路桃紅
絲光乍失綠隙影繞通夕迷鴛枕上朝漫綺絃中促
馳香陌勞鶯囀艷叢可憐腸斷望併在洛城東

早春即事

眼重朝眠足頭輕宿醉醒
陽光滿前戶雪水半中庭
物候隨天氣春光逐地形
北簷梅晚白東岼柳先青
蔥隴抽羊角松巢墜鶴翎
老來詩更拙吟罷少人聽

九日陪樊尚書龍山宴集

孟嘉從宴地千乘復登臨
綠危陟高步憑曠寫幽襟
黃花翫初馥羽酌喜盈斟
雲雜組繡色樂和山水音
旃搖秋吹急筵卷夕光沈
都人瞻騎火猶知隔寺深

邊思

蘇武節毛盡李陵音信稀
梅當隴上發人向隴頭歸

夜步次古城

茫茫興與廢惟有古時城
夜半無鳥雀花枝當月明

寄僧

窓燈寒几盡簾雨曉階愁
何似禪栖客灰心在沃洲

山齋獨宿晏上人

幢幢雲樹秋黃葉下山頭
蟲響音夜難度夢閒神不遊

宿吉祥寺寄廬山隱者

風鳴雲外鐘鶴宿千年松相思杳不見月出山重重

題花樹

都無看花意偶到樹邊來可憐枝上色一一為愁開

送徹公

北風吹霜霜月明荷葉枯盡越水清別來幾度龍宮宿
雪山童子應相迎

春夢

空庭日照花如錦
紅妝美人當晝寢
傍人不知夢中事
惟見玉釵時墜枕

宿青牛谷

隨雲步入青牛谷
青牛道士留我宿
可憐夜久月明中
惟有壇邊一枝竹

仙女詞

玉京初侍紫皇君
金縷鴛鴦滿絳裙
仙宮一閉無消息
遙結芳心向碧雲

楊巨源

字景山
蒲州人

登寧州城樓

宋玉本悲秋，今朝更上樓。
清波樓下去，此意重悠悠。
晚菊臨杯思，寒山滿郡愁。
故關非內地，一為漢家羞。

辭魏博田尚書出境後因登叢臺

薦書及龍鍾，此事鏤心骨。
親知殊悵悵，徒御方咄咄。
叢臺邯鄲臺，上見新月離。
恨始分明川，原更超忽懷。
仁淚空盡感，事情彌發他。
時躡履聲晚日，升丹闕。

秋日題陳宗儒圃亭悽然感舊

曾隨何水部待月東亭宿今日重凭欄清風空在竹前
山依舊碧閒草經秋綠時物方宛然蛛絲一何速

題趙孟莊

管鮑化為塵交道存如線升堂俱自媚得路難相見懿
君敦三益類俗期一變心同襲芝蘭氣合迴霜霰石門雲
卧久玉洞花尋徧王濬愛旌旗梁竦勞州縣煙鴻秋更
遠天馬寒愈健願事郭先生青囊書幾卷

送李虞仲秀才歸東都因寄元李二友

高翼閒未倦孤雲曠無期晴霞海西畔秋草燕南時
鄴中多上才耿耿丹霄姿顧我于逆旅與君發光儀
同將儒者方獲忝儻人知幽蘭與芳佩寒玉鏘美詞
舊友在伊洛鳴蟬思山陂到來再春風夢盡雙瓊枝
素業且無負青冥殊未遲南橋天氣好脉脉一相思

別鶴詞送令狐校書之桂府

海鶴一為別高程方宵然影搖江漢渚思結瀟湘天
皎

然仰白日真姿栖紫煙含情九霄際顧侶五雲前遐心
屬清都淒響激朱絃超遙聞風雨迢遞各山川東南信
多美會合當有年雌飛唳冥冥此意何由傳

野園獻果呈員外

西園果初熟上客心逾愜凝粉乍辭枝飄紅仍帶葉幽
姿寫瓊實殷彩呈粧頰持此贈佳期清芬羅袖裛

夏日苦熱同長孫主簿過仁壽寺納涼

火入天地鑪南方正何劇四郊長雲紅六合太陽赤赫

熖沸泉壑皸皸焦砂石思滅祝融權期匡諸子宅因投
竹林寺一問青蓮客心空得清涼理證等喧寂開襟天
籟迴步履雨花積微風動珠簾惠氣入瑤席境閒性方
謐塵遠趣皆適淹駕殊未還朱欄敞虛碧

月宮詞

宮中月明何所似如積如流滿田地乍過前殿曾學眉
迴照長門慣催淚昭陽昨夜秋風來綺閣金鋪清影開
藻井浮花共凌亂玉階零露相徘徊稍映明河泛仙馭

滿窓猶在更衣處管絃迴燭無限情環佩憑欄不能去
皎皎蒼蒼千里同穿煙飄葉九門通珠簾欲卷畏成水
瑤席初陳驚似空復值君王事歡宴宮女三千一時見
飛蓋愁看素暈低稱觴願踏清輝徧江上無雲夜可憐
冒沙披浪自嬋娟若共心賞風流夜那比高高太液前

楊花落

北斗南迴春物老紅英落盡綠陰早韶風澹蕩無所依
偏惜垂楊作春好此時可憐楊柳花縈盈艷曳滿人家

人家女兒出羅幕靜掃玉庭待花落寶環纖手捧更飛
翠羽輕裾承不着歷歷瑤琴舞金陳非紅拂黛憐玉人
東園桃李芳已歇獨有楊花嬌暮春

大堤詞

二八嬋娟大堤女開壚相對依江渚待客登樓向水看
邀郎卷幔臨花語細雨濛濛濕菱荷巴東商旅駐帆多
自傳芳酒翻紅袖誰調妍妝回翠蛾珍簾華燈夕陽後
當壚理瑟矜纖手月落星微五鼓聲春風搖蕩窻前柳

歲歲逢迎沙岼間背人多整綠雲鬟無端嫁與五陵少
離別煙波傷玉顏

題表丈二大夫書齋

盛府自蓮花羣公共歲華蘭姿丈人圃松色大夫家素
卷堆瑤席朱絃映絳紗詩題三百首高韻照春霞

送殷員外使北蕃

雙旂將雨露萬里入煙沙和氣生中國薰風屬外家塞
蘆隨雁影關柳拂駝花努力黃雲北仙曹有雉車

送許侍御充雲南哀冊使判官

萬里永昌城威儀奉聖明
冰心瘴江冷霜憲漏天晴
荒外開亭候雲南降旆旌
他時功自許絕域轉哀榮

春晚東歸留贈李功曹

芳田岐路斜脉脉昔年華
雲路青絲騎塵含翠幃
車歌聲仍隔水醉色未侵花
惟有懷鄉客東飛羨曙鷗

酬令狐員外直夜書懷見寄

花枝暖欲舒粉署夜方初
世職推傳盛春刑是減餘
芸

香能護字鉛槧善呈書此地從頭白經年望雉車

送太和公主和蕃

北路古來難年光獨認寒朔雲侵髮起邊月向眉殘蘆
井尋沙到花門度磧看薰風一萬里來處是長安

送供奉定法師歸安南

故鄉南越外萬里碧雲峰經論辭天去香花入海逢鷺
濤清梵徹蜃閣化城重心到長安陌交州後世鐘

長城聞笛

孤城笛滿林斷續共霜砧夜月降羌淚秋風老將心靜
過寒壘徧暗入故園深惆悵梅花落山川不可尋

秋日韋少府廳池上詠石

主人得幽石日覺公堂清一片池上色孤峰雲外情舊
林紅蘚在秋水綠痕生何必澄湖畔移來有令名

清明日后土祠送田徹

清明千萬家處處是年華榆柳芳辰火梧桐今日花祭
祠結雲綺遊陌擁香車惆悵田郎去原迴煙樹斜

春日送沈贊府歸潯陽覬叔父

潯陽阮咸宅九派竹林前
花嶼高如浪雲峰遠似天
江聲在南巷海氣入東田
才子今朝去風濤思渺然

和權相公南園閒涉寄廣宣上人

浩氣抱天和閒園載酒過
步因秋景曠心向晚雲多
翠玉思迴鳳玄珠肯在鵲
問師登幾地空性奈詩何

與李文仲秀才同賦泛酒花詩

若道春無賴飛花合逐風
巧知人意裏解入酒杯中
香

濕勝含露光搖似泛空請君迴首看幾片舞芳叢

同趙校書題普救寺

東門高處天一望幾悠然白浪過城下青山滿寺前塵
光分驛道嵐色到人煙氣象須文字逢君大雅篇

春日與劉評事過故證上人院

曾共劉諮議同時事道林與君方掩淚來客是知心階
雪凌春積煙鐘向夕深依然舊童子相送出花陰

冬夜陪丘侍御先輩聽崔校書彈琴

雪滿中庭月映林謝家幽賞在瑤琴楚妃波浪天南遠
蔡女煙沙漠北深顧盼何曾因誤曲殷勤終是感知音
若將雅調開詩興未忝丘遲宿昔心

題賈巡官林亭

白鳥閒棲亭樹枝綠樽仍對菊花籬許詢本愛交禪侶
陳實由來是好兒明月出雲秋館思遠泉經雨夜窓知
門前長者無虛轍一片寒光動水池

和元員外題昇平里新齋

因知休沐諸幽勝遂肯高齋枕廣衢舊地已開新玉圃
春山仍展綠雲圖心源邀得閒詩證肺氣宜將慢酒扶
此外惟應任真宰同塵最是道門樞

贈史開封

天低荒草誓師壇鄧艾心知戰地寬鼓角迴臨霜野曙
旌旗高對雪峰寒五營向水紅塵起一劒凌風白日看
曾從伏波征絕域磧西蕃部怯金鞍

贈渾鉅中允

公子髫年四海間城西侍獵雪紛紛馬盤曠野弦開月
雁落寒原箭在雲曾向天西穿虜陣慣遊花下領儒羣
一枝瓊萼朝光好綵服飄飄從冠軍

和大夫遼春呈長安親故

嚴城吹笛思寒梅二月冰河一半開紫陌詩情依舊在
黑山弓力畏春來遊人曲岼看花發走馬平沙獵雪迴
旌旆朝天不知晚將星高處近三台

張郎中段員外初直翰林報寄長句

秋空如練瑞雲明天上人間莫問程丹鳳詞頭供二妙
金鑾殿角直三清方瞻北極臨星月猶向南班滯姓名
啓沃朝朝深禁裏香爐煙外是公卿

奉寄通州元九侍御

大明宮殿鬱蒼蒼紫禁龍樓直署香九陌華軒爭道路
一枝寒玉任煙霜須聽瑞雪傳心語却被啼猿續淚行
共說聖朝容直氣期君新歲奉恩光

盧郎中拜陵遇雪蒙見召因寄

南宮使者有光輝欲拜諸陵瑞雪飛蘋葉已脩青玉薦
柳花仍拂七車衣應同谷口尋春去定似山陰帶月歸
寒冷出郊由未得羨君將事看芳菲

和劉員外陪韓僕射野亭公宴

好客風流瑋簪重簷高幕晚沈沈綺筵霜重旌旗滿
玉帳天清絃管聲繁威徒過魯儒目衆歡方集漢郎心
寒筵一曲嚴城暮雲騎連嘶香外林

邵州陪王郎中宴

西塞無塵多玉筵
貌貅鴛鴦儼相連
紅茵照水開樽俎
翠幕當雲發管絃
歌態曉臨團扇靜
舞容春映薄衫妍
魯儒縱使他時有
不似歡娛及少年

送定師歸蜀

鳳城初日照紅樓
禁寺公卿識惠休
詩引棣花霑一雨
經分貝葉向雙流
孤猿學定前山夕
遠雁傷離幾地秋
空性碧雲無處所
約公曾許剡溪遊

送澹公歸嵩山龍潭寺葬

野煙秋水蒼茫遠禪境真機去住閒雙樹為容思舊壑
千花成塔禮寒山洞宮曾向龍邊宿雲徑應從鳥外還
莫戀本師金骨地空門無處復無關

早朝

鐘傳清禁纔應徹漏報仙闌儼已開雙闕薄煙籠茜萼
九成初日照蓬萊朝時但向丹墀拜仗下方從碧殿迴
聖道逍遙更何事願將巴曲贊康哉

元日含元殿下立仗上門下相公

臨軒啓扇似雲收率土朝天極水流瑞色含春當正殿
香煙捧日在高樓三朝氣早迎恩澤萬歲聲長繞冕旒
請問漢家功第一麒麟閣上識鄼侯

酬于駙馬

芳時碧落心應斷今日清詞事不同瑤草秋殘仙圃在
彩雲天遠鳳樓空晴花暖送金羈影涼葉寒生玉殿風
長得聞詩歡自足會看春露濕蘭叢

贈張將軍

關西諸將揖容光獨立營門劍有霜知愛魯連歸海上
肯令王翦在頻陽天晴紅幟當山滿日暮清笳入塞長
年少功高人最美漢家壇樹月蒼蒼

和侯大夫秋原山觀征人回

兩河戰罷萬方清原上軍回識舊營立馬望雲秋塞靜
射鵬臨水晚天晴戍閒部伍分岐路地遠家鄉寄旆旌
聖代止戈資廟略諸侯不復更長征

贈隣家老將

白首羽林郎丁年戍朔方陰天瞻磧落秋日度遼陽大
漠寒山黑孤城夜月黃十年依蓐食萬里帶金瘡拂雪
陳師祭衝風立教場箭飛瓊羽合旗動火雲張虎翼分
營勢魚鱗擁陣行誓心清塞色鬪血雜沙光戰地晴輝
薄軍門曉氣長寇深爭暗襲關迥勒春防身賤竟何訴
天高徒自傷功成封寵將力盡到貧鄉雀老方悲海鷹
衰却念霜空餘孤劍在開匣一霜裳

贈侯侍御

逸步辭羣迹忘機結道心
敦詩揚大雅映古酌高音
逃禍栖蝸舍因醒解夢簪
紫蘭秋露濕黃鶴曉天陰
舊葉餘荒草寒山出遠林
月明多宿寺世亂重悲琴
霄漢時應在詩書道未沈
坐期閭闔霽雲暖一開襟

懷德抒情寄上信州座主

五馬江天郡諸生淚共垂
讌餘明主德恩在侍臣知
悵望緘雙鯉龍鍾假一枝
玉峰遙寄夢雲海暗傷離
幢蓋全家去琴書首路隨
滄州值康樂明月向元規
鵷鳳終

凌漢蛟龍會出池
蕙香因暖發松色
肯寒移舉世瞻風
藻當朝揖羽儀
加餐門下意溪水
綠逶迤

春日奉獻聖壽無疆詞三首

文物京華盛謳謠
國步康瑤池供壽
酒銀漢灑宸章靈
羽含雙闕雷霆肅
萬方代推仙祚遠
春共聖恩長鳳展
臨花暖龍鑪傍日
香遙知千萬歲天
意奉君王

其二

鴛鴦形庭際軒車
綺陌前九城多好
樂萬井半祥煙人

醉逢堯酒鶯歌答舜絃花明御溝水香暖禁城天賜宴
文逾盛徵歡物更研無窮艷陽月長奉太平年

其三

代是文明晝春當宴喜時鑪煙添柳重宮漏出花遲漢
典方寬律周官正采詩碧霄傳鳳吹紅旭在龍旗造化
膺神契陽和沃聖思無因隨百獸率舞奉丹墀

奉酬竇郎中早入省苦寒見寄

玄冥怒含風羣物戒嚴節空山頑石破幽澗層冰裂題

詩金華彥接武丹霄烈曠懷玉京雲孤唱粉垣雪窮陰
總凝馭正氣偏肅殺天狼看墜地霜兔敢拒穴悠然蓬
蒿士亦得奉朝謁羸駉苦遲遲單僕怨切切端闡仙階
邃廣陌凍橋滑旭日鴛鴦行瑞煙芙蓉闕司寒申鄭重
成歲在凜冽謝監逢酒時袁生閉門月漸思霜霰減欲
報陽和發誰家挾纊心為聽遠人說

送杜郎中使君赴虔州

迢遞南康路清輝得使君虎符秋領俗鶴署早辭羣地

遠仍連戍城嚴本帶軍傍江低檻月當嶺滿窓雲境勝
閭閻間天清水陸分和詩將惠政頌述九衢聞

夏日裴尹員外西齋看花

笑向東來客看花枉在前始知清夏月更勝艷陽天露
濕呈妝汙風吹畏火燃蕊龍和葉盛爛熳壓枝鮮紅彩
當鈴閣清香到玉筵蝶栖驚曙色鶯語殢晴煙得地殊
堪賞過時倍覺妍芳非遲最好惟是謝家憐

題范陽金臺驛

六國惟求客千金遂築臺若令逢聖代憔悴郭生回

寄薛侍御

世上無窮事生涯莫廢詩何曾好風月不是憶君時

宿藏公院聽齊孝若彈琴

禪思何妨在玉琴真僧不見聽時音離聲怨調秋堂夕
雲向蒼梧湘水深

答振武李逢吉判官

近來時輦都無異把酒皆言肺病同惟有單于李評事

不將華髮負春風

唐昌觀玉藥花詠

晴空素艷照霞門
香灑天風不到塵
持贈昔聞將白雪
藥珠宮上玉花春

賦得灞岸柳留辭鄭員外

楊柳含煙灞岸春
年年攀折為行人
好風儻借低枝便
莫遣青絲掃路塵

贈崔駙馬

百尺梧桐畫閣齊
簫聲落處翠雲低
平陽不惜黃金障
細雨花驄踏作泥

聽李憑彈箏候

聽奏繁絃玉殿清
風傳曲度禁林明
君王聽樂黎園暖
翻到雲門第幾聲

和練秀才楊柳

水邊楊柳綠煙絲
立馬煩君折一枝
惟有春風最相惜
殷勤更向手中吹

題雲師山房

雲公蘭若深山裏月明松殿微風起
試問空門清淨心蓮花不省秋潭水

觀妓人入道

荀令歌鐘北里亭翠蛾紅粉敞雲屏
舞衣施盡餘香在
今日花前學誦經

石倉歷代詩選卷六十四